



N°1690
Entrée le 19.12.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 19.12.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 19/12/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Wirtschaft & Bildung, Kanner a Jugend weiderzeleeden.

D'Regierung huet decidéiert, dass d'Geschäfte an Zukunft méi laang hir Diere kënnen opmaachen. Dëst bréngt mat sech, dass vill Beschäftegt wäerten aner Aarbechtsstonne kréien, wat een Challenge ass fir d'Familljen- an d'Beruffsliewen op eng Linn ze kréien. Déi meescht Crèchen a Maison Relaisen hunn awer aktuell just téschent 5h00 an 19h00 op.

An deem Zesammenhang wéilt ech de Ministeren dës Froe stellen:

1. Wäert d'Regierung higoen an dofir suergen, dass d'Maison relaisen, d'Crèchen an Assistants parentaux och Sonndes mussen opmaachen?
2. Wat ass geplangt, fir d'Konditiounen beim Chèques Service d'Accueil z'änneren fir den neien Öffnungszäiten am Commerce Rechnung ze droen?

Mat déiwem Respekt,

GOERGEN Marc
Deputéierten





Réponse commune de Monsieur le ministre de l'Économie, des PME, de l'Énergie et du Tourisme, Lex Delles, et de Monsieur le Ministre de l'Éducation nationale, de l'Enfance et de la Jeunesse, Claude Meisch, à la question parlementaire n°1690 du 19 décembre 2024 de Monsieur le député Marc Goergen au sujet d'un impact des nouveaux horaires d'ouverture des commerces sur la garde d'enfants

Et sief drop higewisen, dass den éierbaren Deputéierten hei de Projet de loi deen d'Éffnungszäiten an de Secteure vum Handel a vum Handwierk reegelt, thematiséiert. Dësen ass de 16. Dezember 2024 vum Regierungsrat ugeholl ginn an den 20. Dezember 2024 an der Chamber deposéiert ginn. De Gesetzesprojet ass also um Instanzeweeg an d'Commission de l'Économie, des PME, de l'Énergie, de l'Espace et du Tourisme vun der Chamber ass dermat befaasst.

D'Regierung rechent net dermat, datt mat der neier Reegelung vun den Éffnungszäite bedeitend méi Geschäfte an Zukunft sonndes opmaachen oder hir Éffnungszäite verlängeren. De Projet de loi gëtt d'Méiglechkeet am generelle Kader méi laang a sonndes opzemaachen, dëst ass keng Obligatioun.

Aktuell kënnen Geschäfte bis 20h00 an eemol an der Woch bis 21h00 opmaachen, déi meescht maachen awer méi fréi zou. Des Weidere ginn aktuell Derogatiounen zu den normalen Éffnungszäiten ugefrot: wat d'Éffnung sonndes betrëfft, sinn am Schnëtt iwwer 80 % vun de Commercen iwwer Derogatiounen ofgedeckt an am Duerchschnëtt froen all Joer 35 Gemengen eng Derogatioun un, sief et fir eenzel Sonndeger oder fir dat ganzt Joer. Deemno hunn elo scho vill Geschäfte d'Méiglechkeet sonndes opzemaachen.

Déi meescht Crèche a Maison Relais (Services de l'éducation et d'accueil [SEA]) hunn aktuell tëschent 7h00 an 19h00 op. Dageselteren betreiwen vereenzelt Kanner zu méi flexibelen Zäiten.

D'SEA kënnen aktuell tëschent 5h00 an 23h00 op sinn (Artikel 3 vum *Règlement grand-ducal modifié du 14 novembre 2013 concernant l'agrément à accorder aux gestionnaires de services d'éducation et d'accueil pour enfants*). Dat nämmecht gëllt fir d'Mini-Crèches (Artikel 3, Punkt 7bis vun der *Loi modifiée du 4 juillet 2008 sur la jeunesse*).

D'Dageselteren (Assistantes parentales) kënnen an der Nuecht en Accueil assuréieren (1. Artikel, 1. Alinéa vun der *Loi modifiée du 15 décembre 2017 portant réglementation de l'activité d'assistance parentale*).

Et ass haut méiglech, eng Bildungs- a Betreuungsstruktur sonndes ze bedreiwen.

De Gestionnaire entscheet – am Respekt vun de gesetzlechen Dispositiounen an a Funktioun vun der Nofro – iwwer d'Éffnungszäiten vun der Bildungs- a Betreuungsstruktur.



Am Oktober 2024 zum Beispill ware bei 32 Assistantes parentales (vun insgesamt knapp 400) Kanner sonndes ageschriwwen. Et goufen keng Kanner an engem SEA oder an enger Mini-Crèche sonndes betreit.

Et ass am Moment net virgesinn, den Dispositif Chèque-service accueil am Hibleck op déi nei Öffnungszäiten unzepassen. Haut ass et schonn méiglech fir Bildungs- a Betreuungsstrukturen, sonndes op ze maachen wann de Bedarf besteet.

Luxembourg, le 20/01/2025

Le Ministre de l'Économie, des PME,
de l'Énergie et du Tourisme,

(s.) Lex Delles